

皇
明
詔
制

皇明詔制序

臣聞帝王之制有典有
謨有訓有誥有誓有命
孔安國以爲書之六體
虞夏商周爰著爲經皆
稱敕天之命易象姤后

以施命誥四方記贊絲綸所以應接羣后蓋聖言明赫萬世不易者也
我

國家稽古考文諭百官曰
詔曰誥曰制曰敕曰冊

日諭曰書皆審署其體
循事而用昭大制也而
其誕揚休命敷告萬邦
以昭一代之章程垂萬
年之成憲則無如詔恭
惟

成方冊凡我

祖宗

列聖創守鴻規美善備具卽以
光耀離明之治鼓吹雅
頌之音作配圖疇之奧
折衷刑賞之書考定中

壤與天球河圖同其鎮
重臣備員史局時簪筆
纂述得効編摩茲者待
罪南禮伏覩故府

歷朝詔制在焉是憲是章懼有
散軼於是恭爲編輯錄

高皇帝應天受命制作一新
文皇帝丕承治統謨烈重光
列聖相傳與時斟酌深仁滅澤
淪浹肌膚密緯纖綸綱
維羣象迄今二百八十
餘年昌明宏遠直配天

和之極何不可者往

高皇帝開國會命詹同宋濂纂
修日曆貯之金匱副在
秘書濂又言於

上曰日曆藏在天府人不可見
臣請更輯一書傳天下

後世

賜名寶訓刊示臣工臣今所

以輯

詔制而傳者庶幾竊取先臣
濂刊布

寶訓之義乎至我

今上覲光揚烈又將遠追二
帝三王之上我

國家大一統之盛萬年有
道之長史可勝書哉

臣

恍與先臣濂等對越鎬
京共執簡一廷以此編

爲纂述之始事云爾

崇禎七年冬十月朔通

議大夫南京禮部右侍

郎署部事臣孔貞運謹

序

通議大夫南京禮部右侍郎臣孔貞運編輯

司務廳司務臣薛邦獻

儀制清吏司主事臣劉光震

祠祭清吏司郎中臣趙之驊

主事臣孫必顯

主客清吏司郎中臣黃學元

精膳清吏司郎中臣曾應瑞較閱

儒士胡言督刻

皇明詔制目錄

卷一

太祖傳示中原檄

洪武年

卽

位詔

元年

封高麗國王詔

元年

封占城國王詔

元年

諭安南占城息爭詔

元年

諭帖木兒來歸詔

元年

以金陵大梁爲南北京詔

元年

大赦天下詔

元年

求賢詔

元年

命陳日照襲封安南國王詔

元年

改燕城爲北平府詔

元年

免北平燕南河東山西北京河南潼關唐鄧秦

隴等處稅糧詔

二年

免寧國府稅糧詔

二年

免江左州郡稅糧詔

二年

封新野縣城隍之神詔

二年

免凋弊地方稅糧詔

三年

分封諸子爲王詔

三年

設科取士詔

三年

正定神號詔

三年

封元後詔

三年

定功臣將士爵賞詔

三年

以汪廣洋胡惟庸爲左右丞相詔

四年

免兩浙秋糧詔

四年

免江西秋糧詔

四年

免應天太平鎮江寧國廣德秋糧詔

五年

正禮儀風俗詔

五年

命胡惟庸爲左丞相陳寧爲御史大夫詔

六年

諭大理詔

七年

諭雲南詔

七年

存恤兵難官軍人等詔

七年

慎恤刑詔

七年

農桑學校詔

諭暹國王詔

赦汪東朶兒只詔

免山西陝右稅糧詔

九年

免河南北平楊州等處省郡稅糧詔

九年

諭福建布政使司叅政魏鑑瞿莊詔

九年

又詔

九年

天變許令臣民言過詔

九年

諭靖江王府文武官詔

九年

諭山東布政使吳印詔

九年

諭山西布政使華克勤詔

十年

諭元臣納哈樞詔

諭元丞相哈刺章蠻子驢兒納哈樞等詔

諭元丞相驢兒詔

諭高麗國王詔

免江左姑熟等六州四縣秋糧詔

十一年

免北平夏稅秋糧詔

十二年

諭日本國王詔

更定五府六部詔

十三年

雷震謹身殿赦天下詔

十三年

御正殿制

十三年

答太師李善長等表請上壽制

大免天下秋糧詔

十三年

諭安南國王詔

諭安南國王陳煒伯陳叔明詔

諭諸司修職詔

十三年

免江左五郡秋糧詔

十四年

平雲南詔

十五年

諭雲南詔

十五年

諭雲南諸夷詔

免直隸江浙河南山東稅糧詔

十五年

大赦天下有罪詔

十七年

禁諸司奸貪擾民詔

十八年

免災傷地方秋糧詔

十八年

禮齒德恤孤獨詔

十九年

有司責任條例敕

二十三年

冊立皇太孫詔

二十五年

赦藍黨胡黨詔

二十六年

免江東五郡秋糧詔

二十八年

仍免江東五郡秋糧詔

二十九年

再選誤落科第詔

三十年

諸司拖欠稅糧許折輕賚詔

三十年

遺詔

三十一年

○卷二

卽

皇明詔制

洪武

五

位詔

三十五年

爵賞功臣制

三十五年

冊立

皇后詔

永樂年

復封宗室諸王詔

元年

却周王請立東宮詔

元年

尊

太祖高皇帝

高皇后諡號詔

元年

冊立

皇太子分封宗室諸王詔

二年

封懿文第四子爲甌寧王世守其祀詔

三年

大赦天下詔

四年

平安南置交趾三司郡縣詔

五年

免北京稅糧課程詔

六年

巡幸北京詔

六年

親征北虜詔

八年

蕩平北虜班師詔

八年

免陝西稅糧詔

九年

諭天下文武巡狩敕

十一年

阿魯台款軍門撫還部落詔

十二年

老人星見免賀敕

十四年

壽星見免賀敕

十五年

壽星見免賀敕

十六年

北京告成御殿臨朝詔

十八年

諭文武羣臣修職敕

定鼎北京大赦天下詔

十九年

奉天殿災修省寬恤詔

十九年

親征阿魯台平寇班師詔

二十年

再征孽虜蕩掃漠北詔

二十一年

壽星見諭太子羣臣敕

二十一年

也先土千來降錫封班師詔

二十一年

卽

位詔

二十二年

尊

太宗文皇帝

文皇后諡號詔

二十二年

冊立

皇后 皇太子封宗室諸王詔

招安賊盜詔

更化詔

二十二年

洪熙年

郊祀覃恩詔

元年

戒法司慎重刑詔

元年

減免山東徐淮稅糧物料詔

元年

○卷三

卽

位詔

元年

尊

仁宗昭皇帝諡號詔

元年

尊上

皇太后

冊立

皇后詔

元年

宣德年

親征漢王寬宥班師詔

元年

親征胡寇大勝班師詔

二年

長子肇生大赦天下詔

二年

冊立

皇太子詔

三年

廣東進白鳥諭羣臣敕

四年

諭諸司慎治敕

四年

富春寬恤敕

五年

山西進龍馬駒免賀敕

七年

陝西進嘉禾免賀敕

七年

當春優恤敕

七年

省災寬恤詔

八年

卽

位詔

十年

尊

宣宗章皇帝諡號詔

十年

尊上

太皇太后

皇太后封宗室諸王詔

十年

正統年

水旱省示敕

四年

常春寬恤詔

四年

宮殿告成御朝覃恩詔

六年

冊立

皇后詔

七年

尊

太皇太后諭詔

七年

雷震奉天殿大赦天下詔

八年

諭禮工二部修理壇廟敕

九年

甯春寬恤敕

十一年

南京謹身殿災大赦天下詔

十四年

皇太后立

皇太子命邲王攝政詔

十四年

○卷四

卽

位詔

十四年

苗民刼叛赦除其罪詔

十四年

大克胡虜詔

十四年

尊上

上聖皇太后

皇太后冊立

皇后詔

十四年

景泰年

太上皇帝告文武羣臣詔

元年

太上皇帝還京大赦天下詔

元年

冊立

皇太子大赦天下詔

三年

天戒寬恤敕

七年

天順年

復卽

皇帝位大赦天下詔

元年

冊立

皇太子封諸王詔

元年

承天門災大赦天下詔

元年

徵處士吳與弼敕

元年

寬恤建庶人敕

元年

上

太皇后尊號

二年

誅吉祥寬恤天下詔

五年

恭上

皇妣尊諡詔

六年

春旱寬恤天下詔

七年

○卷五

節

位大赦天下詔

八年

恭上

大行皇帝尊諡詔

八年

尊

母后母妃詔

八年

冊立

皇后詔

八年

皇明詔制

目

天順

成化

十二

改冊

皇后詔

成化年

承天門告成寬恤詔

元年

恭上

大行皇太后尊諡詔

四年

慧星見詔

四年

旱澇寬恤詔

六年

冊立

皇太子大赦天下詔

七年

災傷寬恤詔

九年

冊立

皇太子寬恤詔

十一年

復郕王 帝號敕

十一年

歲饑并星變寬恤詔

二十一年

上

皇太后尊號詔

二十三年

○卷六

皇明詔制

卷卽

位大赦天下詔

二十三年

恭上

大行皇帝尊諡詔

二十三年

尊上

太皇太后

皇太后冊

皇后詔

二十三年

弘治年

二十三年

彗星見修省敕

二年

元子誕生布告天下詔

四年

當春慎刑敕

四年

冊立

皇太子寬恤詔

五年

清寧宮災寬恤詔

十一年

卽

位大赦天下詔

十八年

恭上

皇朝通志
大行皇帝尊諡詔

十八年

上

太皇太后

皇太后尊號詔

十八年

正德年

討安化王寬恤詔

五年

誅安化王劉瑾寬恤詔

五年

乾清宮災寬恤

九年

恭上

大行太皇太后尊諡詔

十三年

○卷七

卽

位大赦天下詔

十六年

恭上

大行皇帝尊諡詔

十六年

嘉靖年

上

皇太后

皇后

聖祖母

興獻帝

興國太后尊號詔

元年

冊立

皇后詔

元年

加上

皇太后

恭穆獻皇帝

章聖皇太后尊號詔

三年

定稱

皇伯考

皇伯母

皇考

聖母詔

三年

災變寬恤詔

六年

○卷八

郊祀禮成寬恤詔

九年

皇明詔制

元子誕生寬恤詔

十二年

冊立

皇后詔

十三年

元嗣繼生覃恩詔

十五年

禘祫禮成上

兩宮徽號詔

十五年

尊上

成祖

睿宗號諡配享明堂詔

十七年

崇薦

皇天泰號

太祖

成祖

睿宗尊號禮成大賚天下詔

十七年

冊立

皇太子封諸王敷恩詔

十八年

駕幸承天免承天等處明年田租詔

十八年

仁廟災修省詔

二十年

皇明詔制

皇伯母敬皇后諡詔

二十年

宗廟告成寬恤詔

二十四年

園丘告成詔

登極詔

四十五年

隆慶年

上

聖母尊諡詔

元年

○卷九

冊立

皇后詔

元年

冊立

皇太子寬恤詔

二年

遺詔

六年

登極詔

六年

上兩宮

聖母徽號詔

六年

上

大行皇帝尊諡詔

六年

萬曆年

元嗣誕生詔

十年

征勦逆賊哮拜哮承恩奏凱詔

二十年

乾清坤寧兩宮災罪已詔

二十四年

征勦東夷平秀吉奏凱詔

二十七年

殲平播酋楊應龍敷恩詔

二十九年

冊立

皇太子覃恩詔

二十九年

冊封禮成加上

聖母慈聖皇太后徽號詔

二十九年

誕生

皇太孫恩詔

三十三年

聖母晏駕詔

四十二年

上

恭熹皇太后尊諡詔

四十二年

遺詔

四十八年

○卷十

諭禮部諡

孝端皇后敕

四十八年

泰昌年

登極詔

四十八年

遺詔

四十八年

天啓年

登極詔

四十八年

上

孝端皇后尊諡詔

四十八年

上

孝靖皇后尊諡詔

四十八年

泰昌年

泰昌大統曆敕

泰昌元年

上

大行皇帝尊諡詔

元年

天啓年

追諡悼懷太子敕

四年

誕生

皇太子恩詔

五年

皇極殿告成詔

六年

追諡獻懷太子敕

六年

遺詔

七年

今

上登極詔

七年

上

孝純皇后尊諡詔

冊立

皇后詔

七年

上

皇兄大行皇帝尊諡詔

七年

崇禎年

上

皇嫂懿安皇后尊號詔

元年

元嗣誕生覃恩詔

二年

冊立

皇太子覃恩詔

三年

皇明詔制卷一

太祖傳檄中原

檄曰自古帝王臨御天下中國居內以制夷狄
夷狄居外以奉中國未聞以夷狄治天下者也
自宋祚傾移元以北狄入主中國四海內外罔
不臣服此豈人力實乃天授然達人志士尚有
冠履倒置之歎自是以後廢壞綱常至於弟收
兄妻子烝父妾上下相習恬不爲怪其於父子
君臣夫婦長幼之倫瀆亂甚矣夫人君者斯民

之宗王朝廷者天下之根本禮義者御世之大防其所爲如彼豈可爲訓於天下後世哉及其後嗣沈荒失君臣之道又加以宰相專權憲臺報怨有司毒虐於是人心離叛天下兵起使我中國之民死者肝腦塗地生者骨肉不相保雖因人事所致實天厭其德而棄之之時也古云胡虜無百年之運驗之今日信乎不謬當此之時天運循環中原氣盛億兆之中當降生聖人驅逐胡虜恢復中華立綱陳紀救濟斯民今一

紀于茲未聞有濟世安民者徒使爾等戰戰兢兢處於朝晉暮楚之地誠可矜閔方今河洛關陝雖有數雄忘中國祖宗之姓反就胡虜禽獸之名以爲美稱假元號以濟私恃有衆以要君阻兵據險互相吞噬反爲生民之巨害皆非華夏之主也予本淮右布衣因天下亂爲衆所推率師渡江居金陵形勢之地今十有三年西抵巴蜀東連滄海南控閩越湖湘漢沔兩淮徐邳皆入版圖奄及南方盡爲我有民稍安食稍足

兵稍精控弦執矢目視我中原之民久無所主
深用疚心予恭天成命罔敢自安方欲遣兵北
逐羣虜拯生民於塗炭復漢官之威儀慮民人
未知反爲我讐挈家北走陷溺尤深故先諭告
兵至民人勿避予號令嚴肅無秋毫之犯歸我
者永安於中華背我者自竄於塞外蓋我中國
之民天必命中國之人以安之矣夷狄何得而
治哉

詔勅

奉

天承運

皇帝詔曰朕惟中國之君自宋運旣終天命真人於
沙漠入中國爲天下主傳及子孫百有餘年今
命運亦終海內疆土豪傑分爭朕本淮甸庶民
荷

上天眷顧

祖宗之靈遂乘逐鹿之秋致英賢於左右凡兩淮兩

浙江東江西湖湘漢沔閩廣山東及西南諸部
蠻夷各處寇攘屢命大將軍與諸將校奮揚威
武皆已戡定民安田里今文武大臣百司衆庶
合辭勸進尊朕爲皇帝以主黔黎勉狗輿情於
吳元年正月初四日告祭

天地于鍾山之陽卽皇帝位于南郊定有天下之號
曰大明以吳元年爲洪武元年是日恭詣

太廟追尊四代考妣爲皇帝皇后立大社大稷於京
師以冊寶立妃馬氏爲皇后長子標爲皇太子

布告天下咸使聞知

洪武元年正月初四日

奉

天承運

皇帝詔曰朕肇膺正統誕撫多方乃眷高麗襲朝鮮
之遺壤克尊中夏逾渤海而稱臣頃詔使之往
臨卽表詞之來上有嘉方物良例衷情蓋由夙
慕於華風用是恪修於臣職況爾三韓之累世
皆慎始終屬茲四海之一家何殊内外爰稽彝
制載錫真封今遣官賫印仍封爾爲高麗國王
於戲保民社而王纂榮懷於舊服守禮義之國

作屏翰於東藩其始自今毋替朕命故茲詔示
想宜知悉

洪武元年 月 日

奉

天承運

皇帝詔曰咨爾占城國王素處海邦莫居南服自乃
祖父世篤忠貞嚮慕中朝恪守臣職卽今朕肇
承大統撫馭萬方欲率土之咸寧嘗馳書而往
報而爾能畏天命知尊中國卽遣使稱臣來貢
方物思法前人之訓以安一境之民眷爾忠誠
良可嘉尚是用遣官賁印仍封爾爲占城國王
於戲以內治外朕方以一視同仁以小事大爾

尚慎終如始永爲藩輔益勉令名故茲詔示想
宜知悉

洪武元年 月 日

奉

天承運

皇帝詔曰朕居中國統天下法古先帝王一視同仁
每欲使四夷俱安近者海外諸國皆來臣服貢
獻方物占城上言安南出兵連年侵境朕未知
實否今爲爾兩國言之和睦隣境乃保國之善
道故善爲國者各守其封疆各安其民人上順
天道天必佑之世道得以久長若各不安分構
怨交兵縱其君長身雖無損而害及生民又何

利乎甚而至於天地神人共憤共怒其患將有
不可測者此豈保國之道哉朕爲天下主治亂
持危理所當行今遣使諭爾兩國若彼此果有
所爭當卽罷兵以和睦隣境爲念畏天保民安
疆土以永傳于子孫豈不美歟故茲詔示想宜
知悉

洪武元年 月 日

奉

天承運

皇帝詔曰自昔帝王之得天下當大業垂成之際尤
必廣示恩信雖素相讐敵者亦皆兼收而竝用
之所以法天地之量而成混一之業也朕自起
兵淮右收攬羣雄平定華夏惟西北邊備未脩
益以擴廓帖木兒猶守孤忠保其餘衆居于沙
漠以爲邊患朕甚憫之茲用特與寬宥必能知
時達變慨然來歸其所部將士多我中土之人

又武智能當朕一一用之有願還鄉里者聽其
賀宗招孫翥趙恒等果能贊其來歸其功非小
投機之會間不容髮朕言不再其審圖之故茲
詔諭想宜悉知

洪武元年 月 日

奉

天承運

皇帝詔曰朕惟建邦基以成大業興王之根本爲先
居中夏以治四方立國之規模至重自趙宋末
世夷狄入主中國今百有餘載其運乃終羣雄
分爭未見有定於一者民遭塗炭亦已極矣朕
以布衣當擾攘之際拔身戎伍率衆渡江荷

天地眷祐

祖宗積德臣下宣忠三軍用命西平陳友諒東滅張

皇明詔赦

洪武元年

九

二七

士誠南靖閩廣北有中原武功大集混一之勢
已成十六七年間凡儲糧軍需百物科徵頻煩
尤甚民無休息者皆江左一方受供給之繁遂
致天下收平寧之效民初有助於朕其可忘乎
頃幸大梁詢及父老皆曰昔聖人居中國而治
四夷天下咸服朕觀中原土壤四方朝貢道理
適均父老所言乃合朕意可不從乎然立國之
規模固大而興王之根本不輕其以金陵大梁
爲南北京朕於春秋往來巡狩駐守播告天下

使知朕意至於立

宗社建宮室定朝市南京旣創置矣北京其令有司
次第舉行於戲江左開基立四海永清之本中
原圖治廣一視同仁之心故茲詔示想宜知悉

洪武元年八月初一日

奉

天承運

皇帝詔曰天生民而立之君君者奉天而安養斯民者也昔者元政陵夷民失安養羣雄蜂起疆宇爪分朕以布衣入戎伍憤生民塗炭提孤軍與豪傑同志者思所以靖之賴天之靈因民之利干戈所至強殞弱服大河之北以際南海罔不來臣重念推戴以來軍士勞苦農民罷敝未有以安之賢人君子逃匿巖穴未有以來之刑亂

重典未有以平之供億煩重未有以紓之是用
陰陽差謬水旱不時天災屢見朕甚懼焉爰布
溥恩與民更始可大赦天下自洪武元年八月
十一日昧爽以前除謀反大逆謀殺祖父母父
母妻妾殺夫奴婢殺主謀故殺人但犯強盜蠱
毒魘魅不赦外其餘已發覺未發覺已結正未
結正罪無輕重咸赦除之敢有以赦前事相告
言者罪以其罪所有便民事宜條示于後

一出征軍官軍人多有勞苦其家小仰中書

省大都督府厚加存恤

一新附地面起遣到軍人少壯者永爲軍士
老疾無子充軍者聽從其便

一各處起到并陣亡病故軍人寡婦無依倚
者聽從其便

一征進逃軍詔書到日限一箇月以裏赴官
首告官爲資給軍裝行糧送赴軍前其守
禦逃役者亦仰一體首告所在官司應付
行糧起遣還役若限外不首罪復如初

一大軍收附去處得到人民無問諸色人等
不得妄加殺戮若有親屬給親完聚如無
親屬聽從其便其來降者優加禮待

一民間租稅水陸寫遠送納京師實爲艱難
仰中書省輪差夫丁召募水手設法轉運
務從利便毋致重困吾民

一今歲水旱去處所在官司不拘時限從實
踏勘實災租稅卽與蠲免

一各處荒閒田地許令諸人開墾永爲己業

與免雜泛差役三年後並依民田起科稅糧

一鎮江府密邇京畿供給煩重洪武元年租稅災熟不等有司不須檢踏盡數蠲除次年夏稅亦與優免

一各處人民曩因兵燹拋下田土已被有力之家開荒成熟者聽爲已業其田主回鄉仰有司於附近荒田內驗數撥付耕種墾塋房舍不在此限

一山東河南兩湖閩廣新附地面凡異代虧欠係官錢糧未徵到官者盡行革撥

一孔子曲阜廟廷已嘗遣使致祭其襲封衍聖公并世襲知縣並如歷代舊制仍免孔氏子孫差發

一懷才抱德之士久困兵亂潛避巖穴所在官司用心詢訪其實申達以憑禮聘共圖治效

一學校選舉比因軍政未遑與理仰中書省

集議舉行務求實効無尚虛文監察御史
提刑按察司常加勉勵

一各處流移人戶頃因軍政量移地所詔書
到日卽令放還

一各處起到賢良官吏仰中書省量材錄用
老病殘疾者聽從其便

一各處從流遷發者詔書到日卽便放回其
城寨頭目及已發充軍者不在此限

一頃因戡亂刑出軍律未爲平允仰中書省

再行講究務從中典

一各處處決重刑須待秋後無得非時以傷生意

一各處造作物料官給價值務要隨即對物支付毋得一槩科擾於民

一書籍筆墨農器等物不得收取商稅

一各處拖欠係官錢糧自洪武元年正月以前未徵到官者盡行蠲免已入主典之手不在此限

一蒙古色目人民既居我土卽吾赤子果有材能一體擢用

一鰥寡孤獨廢疾不能自養者官爲存恤

一京城被火之家仰中書省量加賑恤

一民年七十之上者許令一丁侍養與免雜泛差役

一御史臺監察御史提刑按察司耳目之寄肅清百司今後遴選賢良方正之人以副朕意合行事宜仰中書省御史臺集議舉

行

一民間凡有不便事理該載不盡者有司明白申舉事輕者中書省卽與施行重者集議聞奏

於戲民墜塗炭十有七年蕩析離居光嶽之氣於焉始復繼自今各厚爾生共享太平之福以臻雍熙不其偉歟布告中外咸使聞知

洪武元年八月十一日

奉

天承運

皇帝詔曰朕惟天下之廣固非一人所能治必得天下之賢共成之向以干戈擾攘疆宇彼此致賢養民之道未之深講雖賴一時輔佐匡定大業然而懷才抱德之士尚多隱於巖穴豈政令靡常而人無所守歟刑辟煩重而士懷其居歟抑朕寡昧事不師古而致然歟不然賢士大夫幼學壯行思欲堯舜君民者豈固汨沒而已哉今

天下頗定日與諸儒講明治道啓沃朕心豈敢
不以古先哲王自期巖穴之士有能以賢輔我
以德齊民者尚不吾棄

洪武元年九月 日

天承運

一、二〇〇〇年

洪武元年 月 日

奉

天承運

皇帝詔曰一海宇以安人心正國統而君天下理勢
所在古今皆然自羣雄乘亂以來四方思治惟
切元綱已隳疆土遂分孰拯斯民以定於一顧
予菲德造此丕圖荷

上天眷祐臣鄰翊贊肇基江左平定中原睠惟幽薊
實彼本根命將北伐列郡皆順已於洪武元年
八月初二日克取燕城胡君遠遁兵無犯於秋

毫民不移於市肆捷音來奏殊副朕懷今改燕
城爲北平府命官屯守海宇旣同國統斯正方
與生民共享安平之福尚賴內外臣僚夙夜公
勤以匡朕之不逮所有事宜條示於後

一殘元父子遠遁沙漠其乃顏剌突等類數
相讐敵必不能容果能審實天命咄嗟來
降待以殊禮作賓吾家

一避兵人民團結山寨詔書到日竝聽各還
本業若有負固執迷者罪在不原

一殘元領兵頭目已嘗抗拒王師畏罪屯聚者有能率衆來歸量材擢用

一故官及軍民人等近因大軍克取之際倉惶失措坐離父母妻子逃遁他所果能自拔來歸並無罪責仍令完聚

一朔方百姓及蒙古色目人民向因兵革連年供給久困弊政自歸附之後並仰各安生理趁時耕作所有羊馬孳畜從便牧養所司常加存恤

一 北平新附地面應有犯罪及官有逋欠但係前代事理並行革撥、

一 秘書監圖書國史典籍太常法服祭器儀衛及天文儀像地里戶口版籍應用典故文字已令總兵官收拾其或迷失散在軍民之間許赴官司送納

一 自兵革以來南北路隔其北平府應有南方之人願還鄉者聽從其便

一 和附州郡總兵官明示禍福隨處招諭

一各處征進軍人其有陣亡病故者仰所在官司隨即埋瘞仍厚恤其家

一新附州城軍民官吏非奉朝省明文毋得擅自科取需索搔擾百姓以妨農務

於戲上體天心俾萬邦之咸乂下從民欲合四海以爲家故茲詔示想宜知悉

洪武元年十月 日

奉

天承運

皇帝詔曰朕本淮右布衣因天下亂率衆渡江保民
圖治今十有四年矣荷

天眷佑西取陳友諒以安荆楚東縛張士誠以平三
吳遂至八番直抵交廣以極于海悉皆戡定重
念中國本我華夏之君所主豈期胡人入據已
及百年

天厭昏淫羣雄並起以致兵戈紛爭生民塗炭是用

命將北征兵渡大河齊魯之民歡然來迎饋糧
給軍不辭千里朕思其民當元之末疲於供給
今旣效順何忍復勞朕爲天下之主深用憫焉
已將山東行省洪武元年稅糧免徵不期天旱
民尚未甦其洪武二年夏秋二稅再行蠲免近
者平燕都下晉冀土地疆宇盡爲國家所有其
民久被兵殘困於徵歛尤甚齊魯之民其北平
燕南河東山西新附地面可將洪武二年稅糧
亦與蠲免一年有司更加存撫以副朕懷

河南諸郡歸附以來久欲惠之奈西北未平則
出師所經擬資糧餉是以未遑今晉冀平大軍
已入矣其北京河南所轄滁徐宿等州已免稅
糧外西抵潼關北界大河南至唐鄧光息洪武
三年夏秋稅糧盡行蠲免以遂朕之初意

今大兵所克秦隴等處新附地面雖嘗設官署
理重念其民久被兵殘困於徵歛洪武二年夏
秋稅糧一體蠲免以遂朕恤民之意故茲詔示
想宜知悉

洪武二年正月

日

奉

天承運

皇帝詔曰朕自淮右渡江駐兵太平開基建業繼克
鎮江下宣城賴

天之靈將士之力西征北伐罔不平定朕念創業之
初軍國所給皆取辦四郡供億繁重未嘗一日
忘之今天下之勢十定其九南北混一有期朕
欲四郡之民次第甦息故先太平次及應天鎮
江俱已蠲免稅糧一年其寧國府洪武二年夏

秋二稅亦與蠲免有司其體朕意益加存恤故
茲詔示咸使聞知

洪武二年正月

日

奉

天承運

皇帝詔曰朕自淮右率衆渡江首定太平以居建業
肇興丕基其太平鎮江宣城廣德爲京師之翼
郡至如興師旅定羣雄六合一家軍需錢糧供
億浩繁止此數郡以足我用子孫萬世何忘江
左之民朕心拳拳舊歲已免稅糧忽遇天旱竟
無可收縱使不免亦無可徵雖惠不及於心有
歉其洪武二年夏稅秋糧寧國府已行詔免應

天太平鎮江再免一年其廣德并滁和無爲州
今歲稅糧亦與蠲免以稱朕意焉故茲詔示想
宜知悉

洪武二年正月

日

奉

天承運

皇帝詔曰帝王受天明命行政教於天下必有生聖之瑞受命之符此天示不言之妙而人見聞所及者也神司淑慝爲天降祥亦必受天之命所謂明有禮樂幽有鬼神天理人心其致一也朕君四方雖明智弗類代天理物之道實罄於衷思應天命此神所鑒而簡在帝心者君道之大惟典神天有其舉之承事惟謹新野縣城隍聰

皇明詔赦

洪武二年

三

明正直聖不可知固有超於高城深池之表者
世之崇於神者則然神受於天者蓋不可知也
茲以臨御之初與天下更始凡城隍之神皆新
其命睠此縣邑靈祇所司宜封曰鑒察司民城
隍顯祐伯顯則威靈丕著祐則福澤溥施此固
神之德而亦天之命也司于我民鑒于邑政享
茲典祀悠久無疆王者施行

洪武二年正月

日

奉

天承運

皇帝詔曰朕聞自古帝王之興必有賴於武功武功者必有資於民力矜恤之道理所當先朕自當位以來于今三年深欲與民同樂於天地間奈緣守帥新成於邊陲大將帥師於土蕃轉輸之勞猶未能已然各處郡邑供給有先後豐歉有不同雖嘗免其稅糧猶慮凋敝之餘未能蘇息其應天鎮江太平寧國廣德滁州和州當創業

之初錢糧供給實爲浩繁止此數郡以充國用
遂致平定四方念其勤勞何時忘之深宜優恤
應天太平鎮江已常免其稅糧二年寧國廣德
滁和已免一年今此七處洪武三年夏稅秋糧
再行蠲免其徽州嚴州金華衢州處州廣信池
州饒州廬州皆以次歸附供給亦爲繁勞今此
九處洪武三年夏秋稅糧亦與蠲免其河南北
平近入版圖重念其民久罹兵革疲困爲甚山
東與河南地方相接其民宜加倍養庶使河南

之民得以相資爲生山東已嘗與免稅糧二年
河南北平已免一年今此三歲洪武三年夏稅
秋糧再行蠲免朕以布衣起事故知黎庶之艱
難稅糧從寬必先郡邑之凋敝所在有司其尚
謹於奉承以體朕恤民之意故茲詔示想宜知
悉

洪武三年三月初一日

奉

天承運

皇帝詔曰朕荷

天地百神之祐

祖宗之靈當羣雄鼎沸之秋奮興淮右賴將帥宣力
創業江左曩者命大將軍徐達總率諸將以定
中原不二年間海宇肅清虜遁沙漠大統旣正
黎庶靖安欲先論武功以行爵賞緣吐蕃之境
未入版圖今年春復命徐達等再征之是以報

功之事未及舉行朕聞古昔帝王之子居嫡長者必正儲位其衆子當封以王爵分茅胙土以名其國朕今有子十人卽位之初已立長子標爲皇太子諸子之封本待報賞功臣之後然尊卑之分所宜早定乃以四月初七日封第二子棧爲秦王第三子櫚爲晉王第四子 爲燕王第五子櫛爲吳王第六子楨爲楚王第七子搏爲齊王第八子梓爲潭王第九子杞爲趙王第十子檀爲魯王姪孫守謙爲靖江王皆受以冊

寶設置相傳官屬及諸禮儀已有定制
於戲奉天法古實爲生民明此倫彝非文武賢
能三軍用命江左民人之助何以致此尚賴各
盡心力以成治功故茲詔示咸使聞知

洪武三年四月初七日

奉

天承運

皇帝詔曰朕聞成周之制取材於貢士故賢者在職
而其民有士君子之行是以風俗淳美國易爲
治而教化彰顯也漢唐及宋科舉取士各有定
例然但求詞章之學而未求六藝之全至於前
元依古設科待士甚優而權豪勢要之官每納
奔競之人辛勤歲月輒竊仕祿所得資品或居
舉人之上其懷材抱道之賢耻於並進甘隱山

林而不起風俗之弊一至於此今朕統一中國
外撫四夷方與斯民共享昇平之治所慮官非
其人有傷吾民願得賢能君子而用之自洪武
三年八月爲始特設科舉以起懷材抱德之士
務在經明行修博古通今文質得中名實相稱
其中選者朕將親策于庭觀其學識品其高下
而任之以官果有材學出衆者待以顯擢使中
外文臣皆由科舉而選非科舉者毋得與官敢
有游食奔競之徒坐以重罪以稱朕責實求賢

之意所有合行事宜條列于後

一鄉試會試文字程式

第一場試

五經義各試本經一道不拘舊格惟務
經旨通暢限二百字以上易程氏朱
氏註古註疏書蔡氏傳古註疏詩朱
氏詩傳古註疏春秋左氏公羊穀梁
胡氏張洽傳禮記古註疏

四書義一道限三百字以上

第二場試

禮樂論一道限三百字以上

詔誥表箋内科一道

第三場試經史時務策一道

策限一千字以上

第三場畢後十日面試

騎觀其馳驟便捷 射觀其中數多寡

書觀其筆畫端楷 算觀其乘除明白

律觀其講解詳審見行律令

上

出身

第一甲三名第一名從六品第二第二三名

正七品賜進士及第

第二甲十七名從七品賜進士出身

第三甲八十名正八品賜同進士出身

一鄉試各省并直隸府州等處通選以五百名爲率其人材衆多去處不拘額數若人

材未備選不及數者從實充貢

河南省四十名 山東省四十名

山西省四十名 陝西省四十名

北平省四十名 福建省四十名

江西省四十名 浙江省四十名

湖廣省四十名 廣東省二十五名

廣西省二十五名 兩京鄉試直隸府州

一百名

一會試額取一百名

一高麗安南占城等國如有行修經明之士
各就本國鄉試貢赴京師會試不拘額數
選取

一開試日期

鄉試八月

初九日第一場十二日第二場十五日

第三場

會試次年二月

初九日第一場十二日第二場十五日

第三場

殿試三月初一日

一年一次開試

一於洪武三年鄉試洪武四年會試

一各省自行鄉試其直隸府州赴京鄉試凡

舉人各具年甲籍貫三代本姓鄉里舉保

縣申州州申府府申行省印卷鄉試中者

行省咨解中書省判送禮部印卷會試

一仕宦已人流品及曾於前元登科并曾仕

官者不許應試其餘各色人民并流寓各處者一體應試

一有過罷閒人吏娼優之人並不得應試

一應舉下第之人不許喧鬧撫拾試官及擅擊登聞鼓違者究治

一凡試官不得將弟男子姪親屬徇私取中違者許赴省臺指實陳告

一科舉取士務得全材但慮開設之初騎射書算律未能徧習除今科免試外候三年

之後務要全備方許中選

於戲設科取士期必得於全材任官惟賢庶可
成於治道咨爾有衆體予至懷故茲詔示咸使
聞知

洪武三年正月十一日

奉

天承運

皇帝詔曰自有元失馭羣雄鼎沸土宇分裂聲教不
同朕奮起布衣以安民爲念訓將練兵平定華
夷大統已正永惟爲治之道必本於禮考諸祀
典知五嶽五鎮四海四瀆之封起自唐世崇名
美號歷代有加在朕思之則有不然夫嶽鎮海
瀆皆高山廣水自天地開闢以至于今英靈之
氣萃而爲神必皆受命於上帝幽微莫測豈國

家封號之所可加瀆禮不經莫此爲甚至於忠臣烈士雖可加以封號亦惟當時爲宜夫禮所以明神人正名分不可以僭差今命依古定制凡嶽鎮海瀆並去其前代所封名號止以山水本名稱其神郡縣城隍神號一體改正歷代忠臣烈士亦以當時初封以爲實號後世溢美之稱皆與革去其孔子善明先王之要道爲天下師以濟後世非有功於一方一時者可比所有封爵宜仍其舊庶幾神人之際名正言順於理

爲當用稱朕以禮祀神之意所有定到各神名
號開列于後

一五嶽稱東嶽泰山之神南嶽衡山之神中
嶽嵩山之神西嶽華山之神北嶽恒山之
神

一五鎮稱東鎮沂山之神南鎮會稽山之神
中鎮霍山之神西鎮吳山之神北鎮醫無
閭山之神

一四海稱東海之神南海之神西海之神北

海之神

一四瀆稱東瀆大淮之神南瀆大江之神西瀆大河之神北瀆大濟之神

一各處府州縣城隍稱某府城隍之神某州城隍之神某縣城隍之神

一歷代忠臣烈士並依當時初封名爵之稱
一天下神祠無功於民不應祀典者卽係淫祠有司毋得致祭

於戲明則有禮樂幽則有鬼神其禮旣同其分

當正故茲詔示咸使聞知

洪武三年六月初三日

奉

天承運

皇帝詔曰朕本農家樂生有元之世何庚申之君荒
淫昏弱紀綱大壞由是豪傑並起海內瓜分雖
元兵轉戰華夏終不能致此天意也然倡亂之
徒首禍天下謀奪土疆欲爲王霸觀其所行未
合於理故皆滅亡亦天意也是時朕年二十有
四擾攘之秋盤桓避難終不能居乃托身行伍
驅馳三年覩羣雄無成徒擾生民朕今率兵渡

江訓將練兵奉天征討于今十有六年削平强暴混一天下大統既正民庶皆安今年六月初十日左副將軍李文忠副將軍趙庸等遣使來奏五月十六日率兵至沙漠於應昌府獲元君之孫買的里八剌及其后妃并寶冊等知庚申之君已於四月二十八日因痢疾歿於應昌大軍所在俘獲無遺中書上言宜將其孫及后妃并寶冊獻俘于

太廟朕心思之深有不忍其君之亡係乎天運所遺

幼孫若行獻俘加殲其身朕所不爲也况朕本
元民天下之亂實非朕始今定四海休息吾民
於田里非朕所能亦天運所致然也尚慮臣民
未知朕意是用播告天下所有事宜條列于後
一總兵官以禮護送買的里八剌已至北平
朕憐帝王之後難同庶民及首亂僭號來
歸者特封崇義侯從其眷屬及母后等同
居飲食服用出官民上故存元之祭祀

一元君之子愛猷識里達臘畏懼倉卒流離

塞北豈不知天運已去人力難爲若審度
朕心籌之左右來撫妻子朕當效古先帝
王之禮使作賓於吾朝果能如是朕不食
言

一元君隨駕人員倉卒迴避者有之賢智者
豈不自度曩者有元興起係是外夷猶能
胡越一家况我中原歷代之君每居中國
而統四夷非止一朝而已如果審識天命
傾心來歸不分等類驗材委用卽今在朝

諸色人物皆已官之朕言不謬

一朕卽位之初卽遣使往諭四夷高麗占城
交趾皆已奉表稱臣惟沙漠之地尚未往
報蓋因庚申之君擁殘兵於應昌故耳今
彼祿位旣終人心絕望詔書到日凡迤北
各枝諸王各愛馬頭目人等並依職來朝
或遣使歸順當與換給印信還領所部本
居地方羊馬孳畜從便牧養

一迤北各枝諸王并愛馬人等若遵前元約

東得安其生。今朕既爲天下主。一視同仁。
華夏無間。姓氏雖異。撫治如前。詔書到日。
敢有違者。必大舉六師。以清沙漠。毋或執
迷以貽後悔。

一迤北達達百姓。因元喪亂。連年起取軍人。
供給車馬。差發繁重。朕甚憫焉。朕今混一
天下。甲兵錢穀。倍於前代。今後迤北人民。
各安所居。

於戲。君舟民水。載覆不常。可不畏哉。然禮德尚

賢使民懷仁天下寧有不治安者乎故茲詔示
咸使聞知

洪武三年六月十五日

奉

天承運

皇帝詔曰朕本農夫託身緇流因有元失馭海宇瓜
分遇時多艱入於軍伍覩羣雄之無律遂率衆
以渡江撫太平定建業選將練兵東征西討幾
二十年荷

上穹垂祐

祖宗積德山川百神之助大將軍等運謀竭忠六軍
用命遂致強殞弱服疆宇奠安諸蕃入貢華夷

一統朕自愧德薄上無以答天心下無以答神
貺恐貽

祖宗之累其何以謝諸將六軍委身暴露之艱苦今
者班師振旅定功封爵欲加以重賞則天下鎮
守之兵及京師護衛之士內外百萬而民之資
力有限薄取輕收非古人中正之道厚歛則有
損於民故遵前代之法取之以中用倉庫錢糧
均其等第以謝軍士崇爵祿頒金帛以勞功臣
朕本疎愚務從古制今定勳爵高下俾其子孫

世襲言通天地詔布中外民庶咸知

洪武三年十一月十二日

奉

天承運

皇帝詔曰朕聞自周至今凡有天下創業之君其間
能保全功臣使得安養而自老者惟漢之光武
後世稱之朕今天下已定有功文武各受爵封
雖有遐荒之夷必欲征進不煩上將之勞況大
將軍收戈解甲於武備之庫息馬家庭從善樂
遊功名兩全古何過哉中書左丞相李善長事
朕以來朝寅而至暮戍而歸今十八年勤勞多

矣朕見其年高驅馳侍立心懷不忍五載於茲
近因其上表告以致政朕已許之使遂其志亦
功名兩全漢之何參過於此乎中書出納百司
庶務不可一時缺人今命中書右丞相汪廣洋
爲中書左丞相叅知政事胡惟庸爲中書右丞
相總理軍國重事於戲任賢使能乃前王之明
哲除讒去佞亦歷代之英君朕雖不敏必須施
爲而後見故茲詔示咸使聞知

洪武四年正月初一日

奉

天承運

皇帝詔曰朕本農夫深知稼穡艱難及至躬率六師
征討四方尤知將士勞苦重荷

上天眷佑平羣雄一天下東際遼海南定諸番西控
戎夷北靖沙漠皆以精銳屯此邊要用安黎庶
未免科徵轉運供給繁重事豈得已惟爾兩浙
之民歸附之後民力未蘇兼以貪官汙吏害民
肥已四載于茲朕甚憫焉今旣掃除奸蠹更用

良善革舊弊而新治道以厚吾民其洪武四年
合納秋糧及沒官田租盡行蠲免於戲食惟民
之天民乃邦之本一視同仁皆吾赤子然恩之
所及時有後先咨爾民人各安生業共享昇平
故茲詔諭想宜知悉

洪武四年五月 日

奉

天承運

皇帝詔曰朕本農夫深知民間疾苦及至親率六師
南征北伐備知將士之勞方今天下一統東戍
遼海南鎮諸番西控數種戎夷北屯沙漠朕以
中國精銳駐守遐荒豈但風俗之殊亦有寒暑
之異艱難萬狀朕不忍言然欲鎮安吾民必資
守邊之力其於科徵轉運未免勞民理勢相須
蓋不得已也念爾江西之民未歸附時土豪割

據地方狼驅蠶食貲財一空歸附之後供給繁
重已經九年其爲困苦朕甚憫焉今年秋糧盡
行優免於戲四海蒼生皆吾赤子愛念之意旦
暮不忘緣事有緩急故恩有先後茲爾人民體
朕至懷故茲詔示想宜知悉

洪武四年五月初四日

奉

天承運

皇帝詔曰嘗聞國以民爲本民以食爲天此有國家者所以厚民生而重民命也朕乘羣雄鼎沸之時率衆渡江兵屯建業十有八年其間高城壘深濠塹軍需造作凡百供給皆爾近京五府之民率先効力濟我時艱民力繁甚朕心不忘天下一統今五年矣雖嘗蠲免四歲稅糧然猶未足以報前勞是用申敕有司其應天太平鎮江

寧國廣德五府洪武五年各納秋糧除頑慢刁
狡不行蓋倉完備及多科害民糧長本戶秋糧
不免外其所管人民秋糧盡行蠲免有司不許
徵收於戲朕欲使爾民優游快樂於田里此朕
之心也然以國家之大供給之繁有必需而必
興者其勢似不容已爾其服勤畎畝以稱朕意
故茲詔示想宜知悉

洪武五年十月

日

奉

天承運

皇帝詔曰朕聞三皇立極導民以時庖厨稼穡衣服
始制民居舍焉五帝之教以仁義不過遵三皇
之良規益未備之時宜當時之君示其所以天
下從之民用和睦自周至于漢唐宋增減損益
用乃有國昌民受時宜家永康朕蒙

皇天后土之恩命統天下

祖宗之靈百神護佑得正帝位紀元五年朕本草茅

之士失習聖書況摧強撫順二十有年常無寧
居一槩祖疎故道理未臻民不見化市井鄉閭
尚然元俗天下大定禮儀風俗可不正乎茲有
所示諭爾臣民詔書之後敢有不遵者治以如
律今將條畫事宜開列于後

一曩因元末大亂所在人民或居鄉里或避
難他方勢孤力弱或貧乏不能自存爲庶
民之家所奴者詔書到日卽放爲良毋得
羈留強令爲奴亦不得收養火者違者候

律論罪仍沒其家人口分給功臣爲奴驅使功臣及有官之家不在此限

一城市鄉村若有殘疾老幼少壯男子婦人一時不得已而乞覓者本里里長及同里上中人戶助以資給是工商聽其工商是農夫聽其農種候其培養成家復還人戶所資之物有司常加檢察毋令失所此卽古之鄰保相助患難相救疾病相扶持之義也爾民誠能遵守而行他日爾之子孫

或有貧乏同里亦必能相助借矣敢有見
乞覓之人不行資給者同里上中人戶驗
其家所有糧食除存留足用外餘沒入官
以濟貧乏若遇旱潦飢荒人民流移者不
在此限若隣里果有富貴好義之家願行
出物賑給者有司其實以聞

一孤獨殘疾不能生理者許入孤老院官爲
依例贍養如或出外乞覓鄉市人民聽以
餘剩之物助養其生敢有箠楚者有司以

關毆論誣告者抵罪此等殘疾之人如或
痊可願出爲民入籍者聽從其便有司毋
得羈留

一鄉黨序齒從古所尚今後民間士農工商
人等凡平居相見及歲時燕會揖拜之禮
幼者先施坐次之列長者居上如佃戶見
佃主不論齒序並行以少事長之禮若在
親屬不拘主佃止行親屬禮

一鄉飲酒禮廢缺已久宜令中書省詳定條

式頒行遵守使民歲時燕會習禮讀書讀律期于申明朝廷之法敦敘長幼之節

一古之婚禮結兩姓之好以重人倫近代以來專論聘財習染奢侈宜令中書省集議定制頒行遵守務在崇尚節儉以厚風俗違者論罪如律

一古之喪禮以哀戚爲本治喪之具稱家有無近代以來富者奢僭犯分力不及者揭借財物炫耀殯葬及有惑於風水停柩經

年不行安葬宜令中書省集議定制頒行
遵守違者論罪如律

一今後蒙古色目人民既居中國許與中國
人結婚姻不許與本類自相嫁娶違者兩
家男女俱沒入官爲奴其色目欽察若中
國之人不願與之結婚姻者聽其色目欽
察自相婚姻不在限

一兵興以來所在人民拋下產業逃避他方
天下既定乃歸鄉里中間若有丁力少而

舊田多者不許依前占護止許儘力耕種
到頃畝以爲已業若有去時丁少歸則丁
多而舊產少者許於附近荒田內官爲驗
其丁力撥付耕種爲業敢有以舊業多餘
占護者論罪如律

一曩因中國衣冠狃於胡俗已嘗考定品官
命婦冠服及士庶衣冠通行中外俱有定
制惟民間婦女首飾衣服尚循舊習宜令
中書省集議冠服定制頒行遵守務復古

典以革舊習

一僧道之教本以誘民爲善近代以來凡爲僧爲道遇民間修齋喪事之際男女溷雜飲酒食肉甚非所宜宜令有司嚴加禁約違者治罪

一福建兩廣等處豪富人家多有乞覓他人之子閹割驅使名曰火者敢有違犯以閹割抵罪沒入官爲奴

於戲風俗頽靡胡禮拘焉再整彝倫務遵先王

之法恤念孤寡實爲善政之先顧以德薄恩澤
未孚倉廩未盈六軍四戍尚慮未悅下民之心
恐貽上天之怒夙夜祇懼若履淵冰咨示臣庶
體予至懷期臻禮義之風永底承平之治故茲
詔示想宜知悉

洪武五年五月 日

奉

天承運

皇帝詔曰朕聞古帝王之治天下君爲元首臣爲股肱上下相資同心一德於斯之時民安物阜萬邦來庭皆由德政所致非昏君邪臣所可及也朕平定天下之初數更輔弼蓋識見淺薄任非其人前丞相汪廣洋畏懦迂猾於其伸冤理枉略不留心以致公務失勤乃黜爲嶺南廣省叅政觀其所施察其自省今中書久缺丞相御史

臺亦缺大夫稽古揆今誠爲曠典特命中書左
丞相胡惟庸爲中書右丞相中丞陳寧爲御史
大夫且惟庸與寧自廣洋去後獨署省臺協誠
匡濟舉直錯枉精勤不怠故任以斯職播告臣
民於戲皇天無私福善禍淫惟爾二臣當寅畏
天地恪恭朕命勿以怠爲先以勤爲後各盡乃
心以臻于治欽哉欽哉故茲詔示想宜知悉

洪武六年七月 日

奉

天承運

皇帝詔曰始因有元失馭海內雲擾華夷無主朕近
自洪武元年戊申秋八月羣雄盡平復我漢人
故國統一中夏今經七年四夷諸國皆已通報
無不稱臣人貢惟爾大理不見國王名號未嘗
遣使今年秋翰林承旨詹同奏盡閱羣書方見
西南大理昔在唐宋受封王爵爲元削去國名
止稱土官其國乃元君遺派梁王者王之至今

未得爲王朕會臣僚議依唐宋所封以爾段氏
爲大理國王未知信否故特遣官先行往諭如
果遵依朕命使回卽再遣使者專賞寶印誥命
令爾君臣開設國事同享承平之福如果不然
他日兵會雲南未知勝負何如爾其審之

洪武七年

月

日

奉

天承運

皇帝詔曰朕聞順天者昌逆天者亡古今定論禍福常理也朕起自草萊削平羣雄戡定禍亂今已七年中夏旣安四夷多附絕無強凌弱衆暴寡所以臣順於我者得遂其生共享和平之福惟爾雲南王某乃元君遺派受封西南孤處遐荒猶未臣服以若所爲非遺禍于大理之民必自致喪身滅姓于大理之手二禍之機必有其一

皇明詔敕

洪武七年

五

不可逃者何也蓋雲南土地人民本大理所有
自漢通中國稱臣朝貢至唐宋皆受王封其來
久矣昔因爾元滅其王而統其地及今百年無
有復其故物者邇來元祚傾覆已盡爾尚力據
其地不還大理自王果欺人乎欺天平人雖可
欺天不可欺禍患之報將不旋踵至矣今特遣
爾親族威順王親往開諭如果上順天理下契
人心卽奉貢來庭不然朕當別遣使者直抵大
理仍賜唐宋所封舊號令彼爲王合兵加討悔

將何及於戲胡虜無百年運今已足信人心轉
移之機在人自審而已時不可失爾其思之故
茲詔示想宜知悉

洪武七年

月

日

奉

天承運

皇帝詔曰曩因天下大亂死者不可勝數生者備歷艱辛已有年矣朕起布衣削羣雄定禍亂改元洪武今已七年但才疎德薄旦夕慮

上帝有責思之再三惟兵後苦殃者朕失撫養存問軍士爲朕開拓疆宇奮不顧身沒於戰場屍不至家魂無所依父母年高妻寡子幼一旦拋棄至今不能存活此朕之過也民間經兵避難父

南子北至今不能聚會奉養者有之或子沒親
老而失養親沒子幼而無依亦朕之過也與言
至此實可憫傷今詔天下有司各具名以言朕
當存養使不失所所有存恤事宜條列于後

一出征官軍間有歿於王事或鎮守邊境身
死遠方父母年老妻寡子幼雖常給糧養
贍猶慮失周仰各衛從實取勘依律給優
候子出幼卽令承襲如無應承襲之人所
司應付口糧差人遞送至京官爲存養

一南征北伐軍士歿於邊遠拋棄父母妻子
貧窮無依者仰所司從實取勘應付口糧
差人遞送至京官爲存養若有子雖年幼
可依有親屬可托而願留者聽從其便官
司仍給口糧養贍

一兵興以來各處人民避難流移或有父南
子北至今不曾奉養完聚者有司送還鄉
里或有身死他鄉拋下老幼願回鄉者聽
及各處鰥寡孤獨并篤疾之人貧窮無依

不能自存者所司從實取勘官給衣糧養
贍

一官員仕宦遠方亡歿任所遺下妻子貧窮
不能回鄉者所在有司送還鄉里

於戲君天下者所以爲民也但君思治而民乖
民欲樂而君昏臣希賢而不法君或懦而臣剛
此古今所難也所司奉行者勿以仁爲弊以干
刑憲故茲詔示想宜知悉

洪武七年八月 日

奉

天承運

皇帝詔曰釋罪宥愆者君未嘗輕發發則精詳至甚
豈有罪重而脫僥倖以自權致冤深而含忍無
訴者故有胥災肆赦怙終賊刑載之於書至今
明焉漢唐及元懦君承祖業權由姦佞所持因
有大赦之說雖脫君子之微差善良之誤失則
姦頑得爲漏網之魚鬱含冤於滿地朕德薄才
疎失效聖人之道相繼行之是致五星紊度黎

庶匪寧若悖禮乖仁非朕者誰今不敢不察若
槩脫兇頑於僥倖致良善以無伸豈聖人恤刑
者歟特命中書條陳若果真犯雖笞罪以上俱
各不原其餘註誤因人致罪過失者盡在赦下
所有條畫開示于後

一諸人過誤犯罪如過失殺傷人及失火誤
毀遺失官物之類蓋出於不幸情可矜免
詔書到日各處見問明白及已決未發工
役者悉皆釋放若見問未明見禁未問者

不在赦下

一諸人犯罪失於覺察關防鈐束因而連累致罪蓋非得已情可矜免詔書到日各處見問明白及已決未發工役并已發工役者悉皆釋放若見問未明見禁未問者不在赦下

一官吏人等因公事得罪及鞫問刑獄聽審不明以致失出入人罪若文書遲錯之類情可矜免詔書到日各處見問明白及已

決未發工役并已發工役者悉皆釋放若見問未明見禁未問者不在赦下

一諸人出外營幹事務或因住居寫遠或被有司留難不能給引因而私越度關津以致獲罪情可矜免者詔書到日各處見問明白及已決未發工役并已發工役者悉皆釋放若見問未明見禁未問者不在赦下

一各衙門官吏人等非法行事罪坐官吏其

聽使之人皆非得已情可矜免詔書到日
各處見問明白及已決未發工役者悉皆
釋放若見問未明見禁未問者不在赦下
一諸人但係故犯及知情故縱聽行藏匿引
送說事過錢并出入人罪之類一應真犯
並不在赦下

一各處犯罪見屯種之人既已各安生業不
在釋放之限

於戲肆赦於青災爲良善者圖賊刑於怙終實

王綱而治惡凡吾臣庶律已修仁勿干刑憲故
茲詔示想宜知悉

洪武七年十一月 日

奉

天承運

皇帝詔曰農桑衣食之本學校道理之原朕嘗設置
有司頒降條章使敦篤教化務欲使民豐衣足
食理道暢焉何有司不遵朕命往往給由赴京
者皆無桑株數目學校緣由甚與朕意相違特
敕中書令有司今後敢有無農桑學校者論擬
違制杖降罰歷三年後注以吏事出身民有不
奉天時而負地利者如律究焉於戲彝倫不整

實君師之過坐享民供亦豈職分之當爲斯言
旣出臣民聽行永懷多福故茲詔諭想宜知悉

洪武 年 月 日

奉

天承運

皇帝詔曰君國子民非

上天之明命

后土之洪恩曷能若是華夷雖間樂天之樂率土皆

然若爲人上能體

上帝好生之德協和人

神則祿給世世無間矣爾哆囉祿自嗣王位以來內
修齊家之道外造睦隣之方況數遣使中國稱

臣人貢以方今時王言之其哆囉祿可謂賢德
矣豈不名播諸番今年秋貢象至朝朕遣使往
諭特賜暹國王印及衣一襲爾當善撫邦民永
爲多福故茲詔諭想宜知悉

洪武 年 月 日

奉

天承運

皇帝詔曰朕自起兵以來伐強暴官賢能人皆樂從
不十年之間中國安寧惟爾汪來朶兒只棄慈
母之恩抗兄不弟其趙朶只巴助惡不仁苟安
內地輒敢跳跟朕將發副將軍率兵以加之爾
乃遣子入侍今憫其革心向化特命人賁詔釋
爾前罪詔至來朝

皇明詔制

一

洪武

年

六十四

洪武
年
月
日

奉

天承運

皇帝詔曰山西陝西地居西北河山壯麗昔我中國
歷代聖君皆都此而號召萬邦曩因元主華夏
民無的主已經百年矣朕自丁未年復我中土
繼我聖人之位建都炎方于今九年矣其間西
征燉煌北討沙漠軍需甲仗民人備之外有轉
運艱辛內有秦晉二府宮殿之役愈繁益甚自
平定以來民勞未息今者方寧正當與民同享

太平之福於今年三月二十五日敕中書度倉
庫軍有餘糧今將山西陝右二省民間夏秋租
稅盡行蠲免以醒吾民於戲民省君艱則天下
大治五常如令則風雨乃時惟爾臣民想宜知
悉

洪武九年三月 日

天承運

二月召文二
洪武九年

府悉將本年民間夏稅秋糧盡行蠲免所有事宜條列于後

一河南福建江西浙江省所屬府州并直隸揚州池州安慶徽州府洪武九年夏稅秋糧盡行蠲免

一北平省所屬真定等七府已免洪武八年夏稅惟大名一府未經優免其洪武九年本府夏稅秋糧并七府秋糧盡行蠲免

一湖廣省武昌等二十五府所屬州縣并思

南宣慰等司洪武九年夏稅秋糧盡行蠲
免其蘄州黃州二府已免洪武八年秋糧
今年夏稅一體免徵秋糧依舊徵納

一淮安府洪武九年夏稅秋糧盡行蠲免其
上年踏出欺隱不報官田地人戶各該稅
糧并欺隱之數全徵入官不在蠲免之下
一以上各省府應有入官田地私租不在蠲
免之下

於戲從吾化者撫之外吾化者繩之惟爾臣民

皇明詔敕

卷一百一十五

三

日省月新共享無窮之福故茲詔示想宜知悉

洪武九年三月 日

奉

天承運

皇帝詔曰今年仲夏敕卿南行又抵仲秋而彼中政
令得失杳無知者卿郡之籍民也如民焉殊於
民者何至於學焉而閭里曰儒如儒焉已而超
於儒者云何乃至於尚志焉故官於朝然不及
考而遷調之於功未見惟志於業未見惟勤卽
今職於炎方其所轄者甚衆且八閩之地利盡
南海勢控諸番古今居是者君子焉小人焉弊

瞞焉人情焉珠玉焉翡翠焉金銀焉束帛焉子
女焉賢人焉非人焉忠君焉愛民焉修身焉篤
孝焉高名不朽焉沒身絕嗣焉其言殊焉而又
同焉卿其審擇焉力行焉功名遂而身家全矣

洪武九年 月 日

奉

天承運

皇帝詔曰朕觀上古天下之治亂在於君臣能馭不能馭耳若君能馭臣下以禮法臣能馭吏卒以體上故治由此矣若君罔知所以馭臣下臣亦無知以繩吏卒故亂由此而始矣或云吏卒小人其於治亂何干然雖小人凡施小詐動傷國政所以爲亂始若吏卒守分民無枉擾則民安矣所以朕嘗下令入於條章者正欲使上官馭

吏卒動以禮次嚴之以法若吏卒之徒背理而
違法者繩以死地無論此令已入條章久矣人
皆貪官動爲下人所持縱有吏卒縱橫安敢誰
何所以國政無施天下之民受枉治愈弛而亂
愈生由此也朕嘗切恨若爲官布政權無馭吏
卒之威則諸事不成蓋吏卒能爲股肱爪牙若
馭以得法諸事辦集方今有職者孰能爲此忽
九年秋丞相奏福建兩叅政致極刑於一老吏
朕聞當哉若不如律者數如捶死有伺他論故

往諭之今後凡有不如律者如是近行者尤加
急治勿令欺侮方稱是官

洪武九年 月 日

奉

天承運

皇帝詔曰朕本寒微因元多事試與羣雄並驅十有
七年艱難萬狀方得偃兵息民稱尊海內紀年
洪武今已九春秋矣邇者欽天監奏五星紊度
日月相刑於是靜居自省考古今乾道變化殃
禍在乎人君尋思至此惶惶無所措手足惟詔
臣民許言朕過於戲於斯之道惟忠者仁人之
心能鑒朕之不德假公營私又非賢人君子故

茲詔示想宜知悉

洪武九年閏九月 日

奉

天承運

皇帝詔曰洪武九年十二月二十日典寶副林清齋
到從孫守謙表知已達長沙矣朕歷覽表之副
本文辭妥帖誦之忽思從孫之遠行不覺淚下
而又沾襟今進表使歸朕特諭爾王府文武衆
官卽今守謙未壯志若孩童旣出鎮於西南必
文武之臣爲守謙之已能若倚之而不謀縱之
而不導又非賢人君子然孫幼而戇凡導以仁

王之理少有不從從容必以歲月而成其德守
謙本幼朕輒敢令行者爲何蓋謂所保者文武
是也諭至爾諸人恪恭朕意日夕毋怠

洪武九年十月二十日

奉

天承運

皇帝詔曰嘗聞殷高宗思治夜有賢人入夢日以求
之得傳說於版築委任用之海內咸安周文王
起磻溪之釣遂興周八百朕思古有是君亦有
是臣自是之後列聖相傳名臣相繼如斯君臣
者鮮矣昔者天厭元之不德朕乘羣雄並起之
秋摧強撫順偃兵息民綱維海內以主黔黎律
施令布惟務安人巳九年矣其間阻隄律犯令者

不知其數欲的以五刑決之又恐沒身者衆特姑存憲章權以役代又三四年矣俄而天變於上致心惶惶於是詔告臣民許言朕過閏九月初九日詔令旣行布滿天下中外寂然無有言者獨卿敷露肝膽備陳國事雖的否中半豈不盡已之謂忠哉所言中者卽時施行其餘未至者權且勿論朕以至意諭卿卿若日夜如斯爲國爲民則神天鑒焉

洪武九年 月 日

奉

天承運

皇帝詔曰朕每觀前代名臣傳記人各設施皆以律
身保命爲務然後孝於親而忠於君者矣吁志
哉所以名於世者爲斯今朕起草萊定羣雄平
禍亂君王華夷凡我中國之人但知有才藝者
未嘗不使至於朝雖曰至於朝若欲別賢否而
授之以官則又不然云何蓋謂人之才藝可知
其於賢不肖雖在帝堯猶且難之所以不能盡

測人心也朕本無知不敢的以人爲賢否定用
故特以事試之凡受試者當此之際事役其形
財惑其志欲動其心其於孝親忠君律身保命
雖千百人中欲求一士如斯者鮮矣所以昏愚
之徒難保身命孝親忠君者無他但爲役形者
勞其苦不禁財盛者富飲用而且豐欲動其心
色窳窕而妖故非誠志君子不能立命於天地
間所以事不能忠君身不能孝親往往覆命者
若是然有等悠悠之徒雖曰心淳臨事而不果

倒持仁義乃有後艱於斯之道朕嘗命官往事
數以是事諭之而職事者視以常談爲官者雖
簿書之徒皂隸之輩亦莫敢誰何朕嘗切齒忿
恨丈夫之爲無英決嫉惡之心乃爲小人牽制
於戲惜哉而不悟何也俄洪武十年夏五月山
西布政司奏云簿書之徒無端之狀朕敕中書
以考其人人皆累犯不悛前過之徒已入屯所
朕憐一才一藝特脫彼艱難使革心臨事而又
爲非勝常當月特以敕往令刑之其符到山西

皇明詔制

二 洪武十年

七

二

布政司卽如朕命而刑之此可謂除奸去僞者
歟公私咸遂清寧者歟其布政司官當方面承
朕命宣敎化布威德若肯除奸去僞豈慮孝親
忠君之道不至哉豈不如前代名世者乎

洪武十年 月 日

基

天承運

皇帝詔曰人生天地間機變造化得宜時勢不失者乃爲傑丈夫古人有云活千人者其後必封爾爲元臣忠則忠矣何苦違人事而失德有若是耶昔者爾被獲於江東朕特生全爾歸此朕順人心之所好所以好者人人凡有患難誰不欲脫患難而身安者乎當時在俘囚之中果願死乎生乎若以爾已心度之凡兩軍之間有力不

及爾者被爾拘囚而乃盡殺之甚不少當是時
若以已受患難之心推及俘囚者爾必大昌福
及後嗣必有日矣如去年冬爾將兵寇我遼界
彼回軍之日凡棄下者皆生全於我處朕未嘗
輕殺一人曩者黃紬萬戶奉朕命令而往爾處
非已願行實差不由已也本人於爾頗有恩惠
何期爾不思好生惡死之情一旦殺之其爾之
患難爲黃紬所生其黃紬之命爾獨故意殺之
天心神鑒禍將歸焉今爾與朕守邊將士旌旗

相望略較勝負則彼勝我負已兩經矣爲爾所
害者將及八千人皆無生全誠可惜哉然已往
之事不咎未來者可不思乎自今以後若能與
我通一介之使則前日之讐必成冰解火焚矣
諭至之後不然朕言彼必就縛生見朕面恐無
言可對爾思之

洪武十年 月 日

奉

天承運

皇帝詔曰自有元多事羣臣有棄君親而自生者有
抗朝命而自爲者目擊耳聞實非一人獨卿等
奮忠仗義衛君深塞歲月如流儵經十有一年
邇聞所衛之君因疾已崩在卿等可謂有始有
終良臣之名播矣然昔爲人臣今則盡矣或聞
欲立新君其親王者有三卿等正在猶豫之間
朕觀三者誠可再思凡此三人皆元親孫嫡派

不過遙分叔伯而已卿等若欲堅忠貞之意毋
顛尊而扶卑理應自長而至勿無乃人倫正而
天道順也歟若有賢愚之別理難備拘從賢則
吉彼至尊旣崩卿等能推派以立之不絕有元
之祀當此流離之際爲臣者尚能竭力爲之美
聲盈人耳目豈不艱哉若或不然或尊或卑但
以立君爲名內有自專生殺之威則非人臣之
道恐累嘉名況日生頡頏彼此疑猜當此之際
富貴若風中之燭命如草杪之霜甚不難矣故

茲詔論想宜知悉

洪武 年 月 日

奉

天承運

皇帝詔曰天地惡盈而好謙其德好生而惡死此非
時人新造之言乃亘古至今明驗也朕云如是
蓋謂卿等當元天更運命之時卿帥騎步堅忠
貞之節捍禦邊陲已十一年矣每嘗遣人通問
未得回報今再差人詣所在以禦寒之衣作微
禮卿能受賜不傷人命以修後嗣之德豈不智
人也哉朕言至此惟卿以智量之勿爲愚者所

迷書云作善降之百祥作不善降之百殃惟順
理則吉故茲詔示想宜知悉

洪武 年 月 日

奉

天承運

皇帝詔曰使者至貢陳其禮敷王極情朕既聽之事
大之心甚矣表云守候服於東隅祖朝鮮之苗
裔自五季已事中華言無不當然朕觀上古之
君自甸侯綏服之外不治其令土人主之大槩
聖人之心體天道以行仁惟欲民安耳未嘗誇
侈所以不寶遠物不勞夷民聖人之心弘哉今
朕雖不才敢不寶王之臣忠卻來誠之美貢若

漢唐之夷彼隋君之伐東在朕之今日非詐侮
於我安敢違

上帝而勞擾生民者乎若或不守已分妄起事因其
天災人禍必有至者王其審之自今以後薄來
而情厚則可若其厚來而情薄是爲不可王其
思之

洪武 年 月 日

奉

天承運

皇帝詔曰賞功討罪在昔帝王必斯二事爲先曩因
率兵東渡江來姑熟金陵京口宣城廣德徽州
長興安吉宜興江陰相次不逾三年盡入版圖
當時天下豪傑互相雄長殊聲異教若欲平之
非甲仗之餘供給之盛豈能平禍亂一寰宇而
爲人主者耶今禍亂以平朕居大位十有一年
嘗思六州四縣之民久勞於前雖我子孫累世

不忘特以今年秋糧盡行蠲免於戲興王定亂
肇福天下惟斯民之勞先故茲詔示想宜知悉

洪武十二年八月 日

奉

天承運

皇帝詔曰古今民之休息長養惟君主之其於水旱
災傷在有司飛報以聞君親調之邇者廣平馳
驛來奏所屬郡邑天久不雨朕思爲民立燕藩
屏中國保障吾民命工肇造宮殿軍民共成何
期有司差役不均有傷和氣致令民艱種樹除
將布政使薛祥等見行取問其北平所屬地方
洪武十二年夏稅秋糧盡行蠲免

洪武十二年 月 日

奉

天承運

皇帝詔曰曩宋失馭中土受殃金元入主二百餘年
移風易俗華夏腥羶凡志君子孰不興忿及元
將終英雄鼎峙聲教紛然時朕控弦三十萬礪
刃以觀未幾命大將軍律九伐之征不逾五載
戡定中原蠢爾東夷君臣非道四擾隣邦前年
浮辭生釁今年人來否真實非疑其然而徃問
果較勝負於必然實構隙於妄誕於戲渺居滄

溟岡知

帝賜奇甸傲慢不恭縱民爲非將必殃乎故茲詔諭
想宜知悉

洪武 年 月 日

奉

天承運

皇帝詔曰朕膺天命君主華夷當卽位之初會集羣臣立綱陳紀法體漢唐略加增減亦叅以宋朝之典所以內置中書都府御史臺六部外列都指揮使司承宣布政使司指揮使司都轉運鹽使司提刑按察司及府州縣綱紀庶務以安兆民朕嘗發號施令責任中書使刑賞務當不期任非其人致有丞相汪廣洋御史大夫陳寧晝

夜淫昏酣歌肆樂各不率職坐視廢興以致丞相胡惟庸結構羣小夤緣爲奸或枉法以惠罪或執法以誣賢因事發覺人各伏誅特詔天下罷中書廢都府使知更官定制行移各有所歸庶不紊煩今將合行事宜條列于後

一罷中書省陞六部與天下諸司直行事務
一改大都督府爲五軍都督府

一左軍都督府統屬

在京

驍騎右衛

水軍左衛

留守

左衛

龍虎衛 英武衛

在外 山東都司并所轄衛分

遼東都司并所轄衛分

浙江都司并所轄衛分

江西都司并所轄衛分

一右軍都督府統屬

在京 虎賁右衛 水軍右衛 留守右衛

武德衛 廣武衛

陝西都司并所轄衛分

四川都司并所轄衛分

廣西都司并所轄衛分

一中軍都督府統屬

在京

神策衛

廣洋衛

留守

中衛

應天衛

和陽衛

在外

皇陵衛

蘇州衛

太倉衛

鎮海衛

揚州衛

高郵衛

太河衛

淮安衛

沂州衛

鳳陽衛

鳳陽左衛

鳳陽

右衛

鳳陽中衛 長淮衛 懷遠衛

留守中衛 留守衛 滁州衛

滁州千戶所 徽州千戶所

陸安千戶所 鎮江千戶所

安豐千戶所 信陽千戶所

宿州千戶所 洪塘湖千戶所

河南都司并所轄衛分

一前軍都督府統屬

在京 天策衛 龍驤衛 龍江衛

豹韜衛 飛熊衛

在外 湖廣都司

福建都司

福建行都司

廣東都司并所轄衛分

一後軍都督府統屬

在京 鷹揚衛 江陰衛 興武衛

橫海衛 蒙古左衛 蒙古右衛

在外 山西都司

北平都司

山西行都司俱并所轄衛分

於戲周職六卿康兆民於宇內漢命蕭何肇四
百年之洪業今命五府六部詳審其事務稱厥
職故茲詔示咸使聞知

洪武十三年正月 日

奉

天承運

皇帝詔曰朕以菲德托於萬姓之上奉天勤民于茲
十有三年矣不期宰輔失寄肆姦擅權使賢愚
陷於不義朕思創業之艱難念生民之不易首
誅奸惡鋤根剪蔓爰及餘黨然錄刑之際不無
過焉甚非上帝好生之德乃洪武十三年五月
初四日申時雷震謹身殿朕甚懼焉於是赦天
下罪者所有事宜條列于後

皇明詔赦

二〇〇 洪武十三年

八十九

一除十惡不赦外自洪武十三年五月初五日以前已未發覺結正罪無大小咸赦除之

一大軍已有定額近年以來尚有小人指稱軍戶爲由仍將入籍民戶重複抄報擾害不便今後不許

一自洪武初年至十二年終軍人在逃至今着令各所在官司及隣里勾提尚且不絕赦書到日一切住罷只以見籍爲定

一太平鎮江宣城廣德滁濠今歲秋夏稅糧
免徵

一山西布政司奏垛集土軍二萬四千餘戶
一切發爲庶民

於戲上帝好生雖遙穹而聽邇朕時愚昧得罪
於人神從今修省布告臣民故茲詔示想宜知
悉

洪武十三年五月初五日

奉

天承運

皇帝制曰朕聞堯舜之君德備天地禹湯之治大洽
民心朕本才疎德薄惟知圖治弗克行仁乖
上帝后土之好生負海嶽之呵護累

祖宗於地下致五雷奉

命著跡於殿廷雖不遑寧處於斯時甚畏無知於悠
久昨卿等請御大朝故不違羣情朝臣民於正
殿賴爾臣僚毋隱匡輔

卷之三
今按
洪武十三年六月
日

洪武十三年六月
日

奉

天承運

皇帝制曰父母劬勞之恩

昊天罔極當生之日思無上報痛心無已所以奉祀
清晨靜居終日毋敢歌歡邇來卿等數云大平
以朕年高固請稱賀今不違羣情許卿等依期
來朝毋致過奢惟儀肅禮當故茲詔諭

洪武 年 月 日

奉

天承運

皇帝詔曰朕荷

上天眷祐山川效靈祖宗積德君主華夷十有三年
矣倉廩盈府庫充皆吾民之所供今民力未甦
詔告有司洪武十三年天下秋糧盡行蠲免其
放回事故官員自思情無實犯則親自來朝仍
授以職於戲欲消愆而弭禍非致吾民於仁壽
之鄉將何以答

天心之永顧故茲詔諭想宜知悉

洪武十三年六月二十五日

奉

天承運

皇帝詔曰前者朕令安南來見期以三年遣使一朝
所貢之物惟是表意而已若事大之心永堅何
在物之盛今年使者黎公等至仍前遠貢豐物
何不遵朕至意豈彼中紊亂紀綱更王易位有
所疑猜而如是乎然君臣之分本定奈何昔王
荒昏於上致令如斯豈非天假手歟朕又聞方
今之王亦族中人爲之或者可吁中國聖人有

皇明詔制

洪武年

九十四

云將欲取天下而爲之吾見其不得已天下神器也不可爲也爲者敗之執者失之今陳煥奪位而爲之必畏天地而謹事神恤及黔黎庶膺王爵儻或慢天地而虐庶民又非久長之道且安南限山隔海遠居蕞爾天造地設帝命王於彼者以主生民中國有道之君必不伐尚強無知者必征今朕統天下惟願民安而已無強凌弱衆暴寡之爲安南新王自當高枕無慮加也

洪武 年 月 日

奉

天承運

皇帝詔曰朕聞春秋諸侯之國皆自喪其福然後相繼而滅亡者云何蓋謂逆君命而禍黔黎故天鑒若是有不可逃其禍也假使當時之諸侯惟天王之命是從豈不同周之固何期捨長富貴而貪高位致富貴若草杪之朝露賢不云乎毋爲禍首毋爲福先爾叔明自臨事以來國中多事民數流離此果爾兄弟慕福而若是耶抑民

有愆而致是耶然固往者不可諫豈不知來者之可追易不云乎積善之家必有餘慶積不善之家必有餘殃斯言若行則天意可回且天地之廣掌民者衆若邦有道固封疆勿外求則世爲永福若越境而殃他民則福命未可保也爾安南與占城忿爭將十年矣是非彼此朕所不知其寃未伸而讐未解將如之何爾叔明如聽朕命息兵養民以遂天墜後必無窮之福矣若否朕命而必爲又恐如春秋之國自取之也聖

人有云以道佐人主者不以兵強天下何也其
殺伐之事好還故知者不爲爾其圖之鑒春秋
之失豈不美乎

洪武 年 月 日

奉

天承運

皇帝詔曰朕荷

天地之祐

祖宗之德

君主華夷十有三年矣其立綱陳紀所以安民也曩
因奸臣弄權恣行不法內外百職咸罔克忠弗
修誠敬以及神人惟貪賊蠹政遂致典刑邇來
有司皆出編氓深知稼穡艱難民生疾苦是用

授以職任相與圖治當竭誠以報効無蹈愚奸
其舊任未代者若仍復前非慢神虐民務在貪
財肆意妄行則國有常憲於戲政在養民實
先聖之令典竭忠司事尤人臣之當爲故茲詔諭
咸使聞知

洪武十三年九月初七日

奉

天承運

皇帝詔曰朕荷

天地

祖宗護佑

山川百神效靈在位十有四年思昔創業之初軍需
甲仗惟江左五郡之民其勞甚矣特以洪武十
四年秋糧太平應天鎮江廣德寧國五郡除官
田減半徵收其民田盡行蠲免於戲立法以繩

頌施恩以撫善斯做先王之道非朕所能故茲
詔諭咸使聞知

洪武十四年十月 日

奉

天承運

皇帝詔曰朕荷

上天眷祐海嶽効靈

祖宗積德自卽位以來十有五載寰宇全歸於版圖
惟西南諸夷爲雲南梁王所惑恃其險遠弗遵
聲教特命征南將軍潁川侯傅友德副將軍永
昌侯藍玉西平侯沐英率甲士三十萬衆馬步
並進罪彼不庭大軍旣臨渠魁盡獲雲南已平

詔示天下臣民共知於戲福民永已聖賢之爲
逆天違命根禍殃民身家被罪惟西南諸夷應
之故茲詔諭想宜知悉

洪武十五年二月二十日

奉

天承運

皇帝詔曰曩因元政不綱豪傑縱橫朕提師旅與之
並驅十有二年然後命征虜大將軍平華夏諸
將四征五年中原是平萬姓寧家紀年已十五
年矣惟爾烏撒烏蒙東川芒部建昌等處抗命
弗庭况雲南梁王誘我邊士自是發征南將軍
穎川侯傅友德副將軍永昌侯藍玉西平侯沐
英率三十萬衆問爾西南諸夷之罪十五年正

月初一日將軍潁川侯等報至言雲南等處盡
行尅復今特遣使賚詔諭爾雲南烏撒烏蒙東
川芒部大理建昌水西普定等處人民今後敢
有不遵教化者加兵討平之所有事宜開列于
后

於戲春秋之義罪重者釋有罪而納逋逃爾雲
南王及諸夷酋長宜其然乎故茲詔諭

洪武十五年 月 日

奉

天承運

皇帝詔曰自有元失馭羣雄並起聲教異爲烝黎各
擅是致廢興疊疊民不聊生朕秣馬厲兵於江
左控弦三十萬以觀諸雄久之羣雄弗成乃命
征虜大將軍平元都肅靖華夏奠安黎庶邇年
以來士不彎弧馬牧平野農耕有餘人皆樂福
惟爾西南諸夷密邇聲教恃險弗庭納逋逃匿
有罪坐受四川之任肆侮中華凡我朝臣孰不

奮恨是以特興問罪之師今雲南旣平諸夷服
從故詔諭以更生之恩所有事宜條列于後
於戲知天命者福臻昧天理者禍至信如四時
速如影響播告諸夷想宜知悉

洪武 年 月 日

奉

天承運

皇帝詔曰嗚呼惟

皇上帝眷我生民自統一以來雖暫有雨暘愆期終
未凶荒然朕豈不知江左之民減衣薄食助我
興王供給浩繁安無貧窘特以洪武十五年夏
秋稅糧除官田減半入官不爲常例民田稅糧
盡行蠲免其浙江江西雖次第歸附爲首定中
原人民爲我供給越大江入河淮抵北平而漕

河南其勞甚矣近年以來江東浙西江西及直隸府州官吏糧長不行優恤小民已行問罪亦以今年秋夏稅糧除官田減半入官不爲常例民田稅糧盡行蠲免所有山東河南民人淳實無巧以取愚無強以凌弱篤力於田畝且山東之民東供遼左北給北平惟山東民資皆至焉北供山西西入關中河南民資歲助關內之民以供官斯二布政司糧今年秋夏亦行盡免

一蠲免稅糧處所 直隸 浙江 江西

河南 山東

一抄割田土今年稅糧照依官田減半入官
不爲常例

一糧長害民已行革去明年錢糧照依黃冊
里甲人等催辦毋得那移作弊違者斷沒
其家

一輸納稅糧已有定限催者毋得過期致罪
如違遷徙爲首者處重

一各處豪民上年以荒田地爲由科歛小民

今後果有拋荒田土許令里甲指實陳告
丈量得實官爲除豁如有不行首告私下
拋荒之人陳告遷沒其家

一凡我良民各守禮法若衆以暴寡強以凌
弱巧以取愚詐以騙良按治得實斷沒其
家遷徙遠方

一各處有田奸頑之家將田詭寄他人名下
詔書到日受寄之家出首告就將本田賞
與承爲已業當處有司卽便給與執照

於戲爲民上而不爲民便豈有不罰者乎自今
以後任事官民毋蹈前非虐我良民故茲詔諭
咸使聞知

洪武十五年四月 日

奉

天承運

皇帝詔曰朕率諸英俊平羣雄安宇內卽位以來十有七年其間罪頑民清吏弊刑賞皆施未曾大赦自洪武十七年三月二十七日昧爽以前大赦天下除謀反大逆謀殺祖父母父母妻妾殺夫奴婢殺主謀故殺人蠱毒魘魅毒藥殺人不赦外其餘已發覺未發覺已結正未結正罪無輕重咸赦除之敢有以赦前事相告言者以其

罪罪之於戲赦過宥罪旣大布以殊恩遷善保安尚同躋於至治故茲詔示想宜知悉

洪武十七年三月二十七日

日

奉

天承運

皇帝詔曰天道以有餘而補不足人不奉天故以不
足奉有餘嗚呼罪盈自己惡怒人神天譴旣臨
尚惡不已復造多非蠹政害民如戶部侍郎郭
桓胡益王道亨閩部等刑部尚書王惠廸侍郎
葛修閩部等兵部侍郎王志閩部等工部侍郎
嚴志德閩部等禮部尚書趙珣閩部等貪賊亂
政罪已分明及其同賊下落尚惡不已爲此也

其殺身之計不將實計所在供招大半妄指平民爲實以致一時不能格彼奸心良善受害嗚呼朕爲民設官爲民造福旣不勝任而且罪盈法古天討以除民害因此愈加害民必欲除奸復生奸其擾害吾民實朕不才之所致今詔天下凡我良民隣朕不敏以居君位嗚呼書不云乎天位艱哉寢食不安以圖民康仰天俯察求治奸貪愈增如此人心爲之奈何然自詔之後凡擾吾民者大赦不赦所有事宜條陳于後

文約諸司不理理者抵罪

一天下諸司衙門毋得賄賂上司敢有賄賂者其犯或彼或此若賄賂者犯必詢因何爲而賄若受賄賂者犯必詢賂因甚而至嗚呼不循朕訓犯之日稽有罪焉

一戶部郭桓兵部王志工部嚴志德刑部王惠廸禮部趙瑁各恃所掌之要脇逼天下諸司所以賄賂之資雲屯霧集

一十二布政毋得送贓六部等衙門若六部

有犯必稽賊自何來若言府府必言州州
必言縣今後窮賊必以此問凡奸貪大小
聞此求賊來源日夜憂懼去邪歸正爲民
造福毋自招愆

一自此一犯且如郭桓五部等或盜倉庫錢
糧或侵欺諸課程接受諸司買求將此錢
鈔著十二布政司兵工刑戶禮五部官著
令朝覲布政司等官假以寄借爲由各帶
賊鈔銀兩每部帶去不下數十萬及其至

司將錢鈔銀兩數布所屬諸司不問貧難
富戶指此爲由生事科歛異日加倍歸還
以此觀之民何生理

一福建道御史于敏北平道御史丁庭舉廣
東道御史吳貞各人爲見問出審刑司右
審刑吳庸等妄指平民已行凌遲示衆其
于敏丁庭舉吳貞所言諸人本欲妄指必
是追賊擾民好于怨謗朝廷今日識破機
會其實伏罪當初物在張今日却指在李

縱有實寄借者以一指十加倍者多所以
各相攸效一槩擾民

一今後行人受差敢有各處索要相送犯者
處死與受者同所以不得已而禁設若不
禁有司歛民與之所差之人既多民之生
理有限供給既廣將何自奉所以嚴禁故
茲詔示想宜知悉

洪武十八年六月二十七日

奉

天承運

皇帝詔曰嗚呼天位艱哉然如是朕自卽位以來十有八年不遑暇食以措民生奈何內外之臣數用弗當罪實在予一人以致上天垂戒災于萬姓所以水旱相仍今聞山東北平雨水愆期農艱栽植歲苗有虧詔書到日今歲秋糧盡行蠲免有司如命毋擾吾民所有事宜條列于後

一詔書所出爲水旱傷民人告所在以甦民

力有司毋得乘此爲由巧取擾害吾民後
犯不赦

一連年以來所在去處災有輕重傷有多寡
有司姦頑不報亦不沿址查踏以致吾民
傷者愈傷下情不能上達

一今後所在去處凡有水旱處災傷一切天
災去處有司若不來聞本處災者宿連名
赴京仰訴災由以憑優恤則朕罪有司於
極刑

於戲上帝好生使宰民者爲民造福朕統天下
代天理物設諸有司分掌收民自詔之後體朕
至意樂吾民生故茲詔示想宜知悉

洪武十八年七月 日

天承運

皇帝詔曰昔元末播蕩海內受兵所在黔黎苦殃甚
矣如此一紀有奇朕命前征虜大將軍中山武
寧王開平忠武王及令公侯羣將等發兵諸道
所向兵偃民得粗安一天下曰大明今十有九
年然奸臣在位譟間臣民恩本施而弗及德將
布而阻行政乖理悖莫甚於此先王之道全未
倣行失有問於高年久撫恤於鰥寡孤獨舊歲

大誥行民從朕命至奸擾吾民者循治歛跡欽
差監生職任諸司想吾民樂生有其漸矣特命
有司存問於高年恤鰥寡孤獨者必得其所篤
廢殘疾者收入孤老處歲給所用使得終天年
所有合行事宜條列于後

一大誥頒行續編繼布山林隱逸巖穴之士
誠能知我出與同遊其造生民之福未審
悅乎

一所在有司精審耆民並無公私曾辱及不

係吏卒倡優年八十九十隣里稱善者備
其年甲行實具狀來聞貧無產業者八十
以上月給米五斗肉五斤酒三斗九十以
上歲加賜帛一疋絮一斤其田產僅足自
贍者所給酒肉絮帛如之富貴人戶京師
應天府鳳陽府民年八十以上賜爵社士
九十以上賜爵鄉士天下民人八十以上
賜爵里士九十以上賜爵社士皆與縣官
平禮並免雜泛差役冠帶服色另議頒行

皇明詔赦

正官歲一存問給賜之物本州縣委敦篤
生員按月詣門禮送母得給與陳粟著爲
令

一所在鰥寡孤獨取勘明白果有田糧有司
未曾除去差發者詔書到日卽與除去設
若無可自養者官歲給米六石其孤兒有
田不能自爲記免差役有親戚者有司責
令親屬收養無親戚者隣里養之母得失
所其無田者有司一體給米六石隣里親

戚收養其孤兒名數分給有無田產以狀
來聞候出勿同民立戶

一篤廢殘疾不能自存未入養濟院者詔書
到日火速驗口收入孤老處依例開支使
得遂其殘生有司如命勿怠

一朕與民約以誠前者黃冊內民冒年者多
今禮高年而尚實德敢有以冒年之徒來
聞受禮尚亂吾政者或被知者告知其家
族誅曾被公私之辱匿而受禮尚者如之

一累年開疆偃兵息民有勞於軍功或矢石傷殘於身體或因傷身亡兒女見存不能生理者所在衛分送赴京來發回原籍改籍爲民一應差發優免一十三年

一垛集土軍因傷殘疾者優免軍役三年其役占戶應當本身改爲貼戶因傷死者優免軍役十年入爲民籍雜泛差役更免三年

一軍官從將征討歿於陣所兒女見存者各

其實跡以憑恤賞子孫襲父職未陞者陞
一等

一逃軍逃囚所在人民勸送出官免致有司
作弊

一所在有司所掌事務本爲民便往往不行
仁政於差發及一切詞訟賣富差貧刑名
有理做無理無理作有理詔書到日今後
有司官吏敢有如此者許群民或百或十
數拏來赴京

一官民吏胥人等除正名表字應令公私身
名於世敢有更名易諱及兩二名字者被
人告發家財給賞告人誅其本身家遷化
外

於戲禮壽尊賢報功酬勞恤孤賑寡古先哲王
之大典令山恩霑必有司如命故茲詔諭想宜
知悉

洪武十九年六月二十日

皇帝敕諭有司衙門方今所用布政司府州縣按察司官多係民間起取秀才人材孝廉各人授職到任之後略不以到任須知爲重公事不謀體統不行終日聽信小人浸潤謀取賊私酷害下民以此仁義之心淪沒殺身之計日生一旦繫獄臨刑神魂倉皇至於哀告懇切奈何虐民在先當此之際雖欲自新不可得矣如此者往往相繼而犯上累朝廷下辱鄉閭悲哀父母妻子孰曾有鑒其非而改過也哉所有責任條例條

陳于後

一布政司治理親屬臨府歲月稽求所行事
務察其勤惰辨其廉能綱舉到任須知內
事目一一務必施行少有頑慢及貪汙坐
視恬忍害民者驗其實跡奏聞提問設若
用心提調催督宣布條章去惡安善倘耳
目有所不及精神有所不至遺下貪官汚
吏及無籍頑民按察司方乃是清

一府臨州治亦體布政司施行耳目有所不

及精神有所不至遺下貪官汙吏及無籍
頑民布政司方乃是清

一州臨縣治亦體府治施行耳目有所不及
精神有所不至遺下貪官汙吏及無籍頑
民本府方乃是清

一親縣臨里甲務要明播條章去惡安善不
致長奸損良如此上下之分定民有所依
巨細事務訴有所歸上不紊政於朝廷下
不啣冤於滿地此其治也歟若耳目有所

三月言
不及精神有所不至遺下無籍頑惡之民
本州方乃是清

一若布政司不能清府府不能清州州不能
清縣縣不能清去惡安善遺下不公不法
按察司方乃是清

一按察司治理布政司府州縣務要盡除姦
弊肅清一方耳目有所不及精神有所不
至巡按御史方乃是清倘有通同貪官汚
吏以致民冤事枉者一體糾治

一此令一出諸司置立文簿將行過事蹟逐
一開寫每季輪差吏典一名齎送本管上
司查考布政司考府府考州州考縣務從
實効毋得誑惑繁文因而生事科擾每歲
進課之時布政司將本司事蹟并府州縣
各費考過事蹟文簿赴京通考敢有坐視
不理有違責任者罪以重刑

洪武二十二年 月 日

皇明詔敕

二
洪武二十二年

二
頁六

下
九

奉

天承運

皇帝詔曰朕荷累世

祖宗修仁積德有感於

皇天后土眷命朕躬亦命諸英勇者爲之助平禍亂
於諸雄擾攘之時朕自甲辰卽王位戊申卽帝
位尊居兩間兵偃民息今三十年矣邇者朝臣
其無忠義者李善長等陰與構禍事覺人各伏
誅今年藍賊爲亂謀泄擒拏族誅已萬五千人

三
日
言
矣餘未盡者已榜赦之猶慮奸頑無知尚生疑惑日不自寧今特大誥天下除已犯已拏在官者不赦外其已犯未拏及未犯者亦不分藍黨胡黨一槩赦宥之嗚呼古之忠臣義士當時感格人神歡動祖宗其亂臣賊子歷代爲患者但不能感格人神於當時亦累祖宗憂囚於地下朕今大誥臣民自生疑惑者許以自新故茲詔示想宜知悉

洪武二十六年九月初十日

奉

天承運

皇帝詔曰朕二十八歲渡江二十九歲入建鄴昔秣
馬勵兵與羣雄並驅旌旗甲杖一應供給皆出
我江東五郡之民以此平定天下禍亂海內寧
謐朕今老矣思民効勞無可撫勞今特以洪武
二十八年合納官民秋糧盡行蠲免少蘇前日
之勞故茲詔示想宜知悉

太平府 應天府 鎮江府 寧國府 廣德

府

洪武二十八年九月初六日

奉

天承運

皇帝詔曰朕定天下之初一應供給皆出太平寧國
應天廣德鎮江五府之民宇內康寧已有年矣
思民効勞無可撫勞今特以洪武二十九年秋
糧不分官民田地盡行蠲免均工夫役依期來
赴故茲詔示想宜知悉

洪武二十九年八月二十二日

奉

天承運

皇帝詔曰朕荷

皇天眷命賜有中土因土宇之廣人民之衆日思月
慮精神有限邇來科第一節托之儒臣有失打
點選後朕於冗務隙中將下第文詞過目知爾
文詞典雅所答中題一時誤落今後爾再選來
復爾科第

洪武三十年三月 日

奉

天承運

皇帝詔曰朕荷

皇天眷命代元爲君統一寰宇主宰生民尊稱宇內
已三十年矣每念設官分職各有攸司邇年以
來各府州縣夏稅秋糧因官貪吏弊不能宣布
條章愈見民力艱苦今特敕戶曹行下諸司所
有積年稅糧拖欠未完者許折輕賚以免轉勞
之苦以悉人民欠輸之罪所有事宜條陳于後

三
爾諸司如朕命勿怠故茲詔示想宜知悉

一布政司直隸府州縣自洪武二十八年以前秋糧夏稅拖欠未納者許折輕費隨地方出產聽從民便

一鈔三貫五百文折米一石金每一兩折米二十石銀每一兩折米四石絹每一疋折米一石二斗綿布每一疋折米一石夏布每一疋折米七斗淨綿花每一斤折米二

洪武三十年十月 日

奉

天承運

皇帝詔曰朕受

皇天之命膺大任於世定禍亂而偃兵安生民於市
野謹撫馭以應天今三十一年矣憂危積心日
勤不怠專志有益於生民奈何起自寒微無古
人之博智好善惡惡不及多矣年已七十有一
筋力衰微朝夕危懼慮恐不終今得萬物自然
之理其奚哀念之有皇太孫允攸仁明孝友天

下歸心宜登大位以勤民政中外文武臣僚同心輔佐以福吾民凡喪葬之儀一如漢文無異布告天下使明知朕意孝陵山川已因其故無有所改

一天下臣民令到出臨三日皆釋服嫁娶飲酒食肉皆無禁

一無發民哭臨宮殿中當臨者皆以旦晡臨各十五舉聲禮畢非旦晡臨時毋得擅哭
一當喪事服臨者皆無跣經帶無過三寸無

布車兵器

一諸王各於本國哭不必赴京中外管軍戍
守官員毋得擅離信地許遣人至

一王國所在文武衙門官吏軍士今後一聽
朝廷節制護衛官軍王自處分

一諸不在令中者皆以此令比類從事故茲
告示想宜知悉

洪武三十一年閏五月十一日